

दिनांक 27.01.2025

समय: 18.45 बजे

- प्रधानमंत्री नरेन्द्र मोदी एनसीसी की वार्षिक रैली ने सम्बोधित कीना— रैली मांय बालिका कैडेट्स की हाल ताई की सब ऊं मोटी तादाद मांय भागीदारी की सराहवणा कीनी।
- केन्द्रीय मंत्री रामदास अठावले कह्यो—केन्द्र सरकार की योजनावां ऊं जनता की जिन्दगी मांय सकारात्मक बदलाव आया।
- राजस्थान हाई कोर्ट मांय तीन और न्यायाधीशां ने शपथ दिरायी ज्यी—हाईकोर्ट मांय न्यायाधीशां की तादाद 33 व्ही।
- प्रदेश मांय कई ठौड़ां शीतलहर रो असर—जयपुर अर भरतपुर संभाग मांय काल कठे—कठे हल्की बारिश रा आसार।

000

प्रधानमंत्री नरेन्द्र मोदी देश बणावण रा काम मांय एनसीसी की भूमिका की सराहवणा कीनी है। वे आज नई दिल्ली मांय राष्ट्रीय कैडेट कोर की वार्षिक रैली मांय बोल रह्या हा। वे कह्यो के एनसीसी नौजवानां ने मजबूत बणावण रो मंच है। ई मौके श्री मोदी कह्यो के एनसीसी रो अनुशासन नौजवानां ने प्रेरणा देवे है।

000

रैली मांय 2 हजार 361 कैडेट्स शामिल व्हा ज्यां मांय 917 टाबरियां ई भेली ही जो एनसीसी वार्षिक रैली मांय सिरकत करण वाळी टाबरियां की हाल ताई की सब ऊं मोटी तादाद है। युवा शक्ति, विकसित भारत थीम माथे राख्यी ज्यी ई रैली मांय 18 मित्र देशां रा 144 नौजवान कैडेट ई सिरकत कीनी।

000

केन्द्रीय सामाजिक न्याय अर अधिकारिता राज्यमंत्री रामदास अठावले जनता ऊं विकसित भारत बणावण मांय भागीदारी निभावण बाबत कह्यो है। आज जयपुर मांय खबरनवीसां सागे बातचीत करता थकां श्री अठावले केन्द्र सरकार की उपलब्धियां रो जिक्र कीनो। वे कह्यो के सरकार की जनता की भला की न्यारी—न्यारी योजनावां रे पाण मोटी तादाद मांय लोगां की जिन्दगी मांय सकारात्मक बदलाव आया है। वे समाज मांय फैली विषमता खत्म करण सारु न्यारी—न्यारी जातियां रा नौजवानां रा ब्याह ने जरूरी बताया।

000

नई दिल्ली मांय आज घरेलू जल क्षेत्र में जल उपयोग दक्षता मुद्दा माथे कार्यशाला राख्यी ज्यी। जल शक्ति मंत्री सी.आर. पाटिल इण रो उद्घाटन कीनो। राष्ट्रीय जल मिशन रा तहत जल उपयोग दक्षता ब्यूरो की ओर ऊं राख्यी ज्यी ई कार्यशाला मांय पाणी की खबत कम करण रा बारा मांय रणनीति माथे चर्चा करी ज्यी। कार्यशाला मांय पाणी ने सावधानी ऊं काम लेवण सारु कम बहाव वाळा उपकरणां अर स्मार्ट सेनेटरी वेयर काम लेवण माथे ई जोर दियो ज्यो।

000

राज्यपाल हरिभाऊ बागडे कह्यो है के अखण्ड भारत रा राज्य विविधता मांय एकता की संस्कृति सागे बण्योडा है। श्री बागडे आज उत्तर प्रदेश, मणिपुर, मेघालय, त्रिपुरा, दादरा अर नगर हवेली, दमन अर दीव रा स्थापना दिवस रे मौके जयपुर रा राज भवन मांय राख्यी ज्यी जळसा मांय बोल रह्या हा। वे विकसित भारत बणावण रा काम मांय सगळा ऊं बराबर भागीदारी की अपील कीनी। राज्यपाल 'एक भारत श्रेष्ठ भारत' रा तैत राज्यां रा स्थापना दिवस मनावण ने खास बताता थकां कह्यो के राजभवन मांय ऐड़ा आयोजन संस्कृतियां की जाणकारी एक—दूजा ने देवण रा बारा मांय बतावे है। राज्यपाल न्यारा न्यारा राज्यां रा नुमाइन्दा सागे बातचीत कर र राज्यां रा बारा मांय जाणकादी दीनी।

000

राजस्थान हाईकोर्ट मांय आज तीन नुवा न्यायाधीशां ने शपथ दिरायी ज्यी। हाई कोर्ट रा मुख्य न्यायाधीश न्यायमूर्ति एम.एम.श्रीवास्तव जोधपुर मांय न्यायमूर्ति चन्द्रशेखर शर्मा, प्रमिल कुमार माथुर अर चन्द्र प्रकाश श्रीमाली ने शपथ दिरायी। ई सागे ही राजस्थान हाई कोर्ट मांय न्यायाधीशां की तादाद बध र 33 व्हे गयी है। राजस्थान हाईकोर्ट मांय जजां की मंजूरशुदा तादाद 50 है।

000

प्रयागराज मांय चाल रह्या महाकुंभ मांय आज गृह मंत्री अमित शाह गंगा, यमुना अर सरस्वती नदियां रा संगम री ठौड़ पवित्र डुबकी लगाई। वे मेळा रा हलका मांय हिफाजती इन्तजामात रो जायजो ई लीनो अर साधु संतां सागे मुलाकात कीनी।

000

इंटरनेशनल स्पेस सेंटर आईएसएस काल रात अंतरिक्ष ऊं महाकुम्भ री तस्वीरां लीनी, ज्यां मांय महाकुम्भ रो अद्भुत नजारो निजर आयो। आं फोटूआं मांय गंगा नदी रे किनारे दुनिया रा सब ऊं मोटा मानव समागम मांय रोशनी री जगमगाहट निजर आ रही है। अंतरिक्ष यात्री डॉन पेटिट अ फोटो सोशल मीडिया प्लेटफार्म ग माथे भेज्या है।

000

नगरीय विकास अर आवासन मंत्री झाबर सिंह खर्चा आज पाली जिला रा सोजत मांय सरकारी अस्पताल रा नुवा ट्रौमा भवन अर लाईब्रेरी रो उद्घाटन कीनो। ई मौके खर्चा कह्यो के नुवो ट्रौमा भवन बण जावण ऊं मरहम पट्टी सारू पाली नी जावणो पड़ेला। पंचायती राज मंत्री मदन दिलावर ई आज बालोतरा जिला मांय कल्याणपुर पंचायत समिति री ग्राम पंचायतां रो औचक दौरा कीनो। वे साफ-सफाई माथे खास ध्यान देवण बाबत कह्यो।

000

अजमेर जिला मांय काल प्रवासी परिन्दां री गिणती रो काम सरू व्हेला। म्हाणी खबरनवीस बतायो के वन विभाग री ओर ऊं जिला मांय 12 जलाशयां माथे करायी जा रही आ गिणती दो फरवरी ताई चालेला।

000

पाली जिला मांय ई काल परिन्दां री गिणती सरू करी जावेला। उप वन संरक्षक पी. बाला मुर्गन बतायो के आ गिणती देसूरी, सुमेरपुर, सोजत, सेंदडा, बाली, मारवाड जक्शन अर जवाई लेपर्ड कंजर्वेशन रिजर्व हलका मांय करी जावेला।

000

उदयपुर अर इन्दौर ने यूनेस्को री ओर ऊं वैटलैण्ड सिटी रो दर्जा दियो ज्यो है। देश रा दो शहरां ने पहली दफा आ मान्यता मिली है। पेश है एक रपट—

000

प्रदेश मांय आज ई ठण्ड रे कारण जिन्दगी माथे असर पड़्यो। अलवर, पिलानी, सीकर, चूरू अर करौली समेत कई ठौड़ां शीतलहर रो असर रह्यो। मौसम विभाग रे मुजब सीकर जिला रा फतेहपुर मांय सब ऊं कम न्यूनतम तापमान आधो डिग्री सेल्सियस दर्ज करी ज्यो।

सीकर अर हनुमानगढ़ जिला रा संगरिया मांय न्यूनतम तापमान 1 दशमलव 4 अर नागौर मांय 2 दशमलव 8 डिग्री सेल्सियस कम ती कम तापमान रह्यो। महकमो जयपुर अर भरतपुर संभाग मांय कटे-कटे काल गरज सागे हल्की बारिश व्हेवण रा आसार जताया है। ई सागे ई आवता दो दिन मांय पारो एक ऊं 2 डिग्री सेल्सियस ताई उतरण री संभावना है।

000

38 वां राष्ट्रीय खेल काल उत्तराखण्ड रा देहरादून मांय सरू व्हेला। प्रधानमंत्री नरेन्द्र मोदी रो इण रो औपचारिक उद्घाटन करण रो कार्यक्रम है। संकल्प से शिखर तक थीम माथे 14 फरवरी ताई चालण वाळा राष्ट्रीय खेल मांय 10 हजार ऊं बत्ता खिलाड़ी सिरकत करेला। राष्ट्रीय खेल मांय राजस्थान रा 421 खिलाड़ी अर 110 अधिकारी ई सिरकत कर रह्या है। अ खिलाड़ी वॉलीबॉल, कबड्डी अर निशानेबाजी समेत 26 होड़ां मांय सिरकत करेला।

000

कोटपूतली-बहरोड़ जिला रा शाहपुरा मांय आज राजस्थान पैरा व्हीलचेयर हॉकी होड़ सरू व्ही। दो दिन री ई होड़ मांय राजस्थान, उत्तराखण्ड, उत्तरप्रदेश अर महाराष्ट्र रा 47 खिलाड़ी सिरकत कर रह्या है। दूजी कानी पाली रा सरकारी कन्या महाविद्यालय मांय आज खेल सप्ताह री सरूआत व्ही। हनुमानगढ़ जिला मांय नशामुक्ति सारू चलाया जा रह्या मानस अभियान रा तहत काल जिला स्तर री खो-खो होड़ राख्यी जावेला। इण मांय जिला रा न्यारा-न्यारा ब्लॉक्स री 15 टीमां सिरकत करेला।

000